

**AI 2016**

**Naalakkersuisut Siulittaasuat – suliassaqarfik 10-12**

**Kontumut pingaarnermut 10.13.11 Aktiaateqarluni ingerlatseqatigiiffinnut toqqaannartumik aningaasartuutit**

Oqaasertaq tulliuttoq kontumut pingaarnermut 10.13.11 Aktiaateqarluni ingerlatseqatigiiffinnut toqqaannartumik aningaasartuutit, oqaasertaliussatut nutaatut ilanngunneqarpoq:

“Naalakkersuisut pisinnaatinneqarput aktiaatileqatigiiffimmik Namminersorlutik Oqartussanit 100 pct.-imik pigineqartumik, Ilulissani, Nuummi Qaqortumilu mittarfinnik nutaanik taakkunungalugu atasunik atortulersuutit sanaartortussamik pilersitsissallutik.

Naalakkersuisut pisinnaatinneqarput aktiaatileqatigiiffimmu 200 mio. kr.-nik piginneqataassutsimut aningaasaliissutsinik aningaasannorlugit akilerneqartunik akiliissasut. Kiisalu Naalakkersuisut pisinnaatinneqarput Namminersorlutik Oqartussat Nuummi, Ilulissani Qaqortumilu mittarfiini atasuni taakkunungalugu ilaareersut illut, teknikkikkut sanaartukkat kiisalu pigisat nuunneqarsinnaasut, nalinginik akileeqataassutikkut akilerneqartunik, Naalakkersuisut ingerlatseqatigiiffimmu piginneqataassutsimut aningaasaliissutit akiliisinnaasutut.

Ingerlatseqatigiiffik pisussaatinneqarpoq Ilulissani Nuummilu mittarfiit pioreersut, akeqanngitsumik Namminersorlutik Oqartussanut atukkiuttussaallugit. Namminersorlutik Oqartussat mittarfinnik pioreersunik ingerlatsinerisigut aningaasartuutit tamarmik akilerneqartassapput isertitallu tamarmik ilanngunneqartassallutik. Piffissami naleqquttumi kalerriinikkut, isumaqatigiissut illua-tungeriinnit tamanit sukkulluunniit atorunnaarsinneqarsinnaavoq.

Iluanaarutit, pissarsiassanik assigisaannilluunniit immikkut ittunik Nunatta Karsiata isertitaqassappat, Naalakkersuisut pisinnaatinneqarput, matuma saniatigut taakkunanga katillugit 100 mio. kr.-t tungaannut naleqartunik, aktiaatileqatigiiffimmu taarsigassarsititsinnaanissamut, imaappat isertitat immikkut ittut isertitatut naatsorsuusiorderi aningaasartuutitullu naatsorsuusiorderi, isertitat atornissaannut politikkikkut aalajangerneqarnerat ataatsikkut pippat. Namminersorlutik Oqartussat namminneq taarsigassarsinermi atugassarititat angusinnaasaat assigalugit akisussaaffitalimmik taarsigassarsiat tunniunneqartarput.

Ingerlatseqatigiiffiup piginneqataassutsimut aningaasaatai Naalakkersuisunit isumagineqassapput Namminersorlutillu Oqartussat piginnittuussallutik.

Ileqquusumik ataatsimeersuarnermi aalajangerneqassapput ingerlatseqatigiiffiup taarsigassarsinissai kiisalu piginnittunik allanik ingerlatseqatigiiffimmu ilanngussiniarnermut isumaqatigiissuteqarnerit. Mittarfinnik nutaanik pilersitsinermut kiisalu pilersaarusiordermut

## **Ilanngussaq 2, oqaasertaliussat oqaasertaliuissanullu nassuiaatit**

attaveqaqatigiinnikkullu pilersitassanut ilaasunut pilersitsinermut atatillugu aningaasaliinissamut aktiaatileqatigiiffik taarsigassarsinnaavoq. Taassuma saniatigut namminersorlutik aningaasaliissutinik ingerlatseqatigiiffimmut ilanngussisinaanissamut aktiaatileqatigiiffik misissuisinnaavoq.

Aktiaatileqatigiiffik Naalackersuisuni ataatsimeersuarnermi akuersinertigut, namminersorlutik suliaqartunik suleqateqarnissamut isumaqatigiissuteqarsinnaavoq, tamanna sanaartormik siuarsaasinnaasutut imaluunniit suliami aningaasaqarnerup tamarmiusup pitsanngorsarneqarneranik kinguneqartussatut siulersuisut nalilerpassuk.

Uppernarsaatit, taarsigassarsinermut uppernarsaatit, takussutissiat aamma attestit il.il. sanaartormermut atatillugu suliarineqartut, oqaasertaliussami matumani ilaatinneqartut, pisortanit naqissusiinermut akitsuutitut pisussaajunnaarsinneqarput. Naqissusiinikkut pisussaajunnaarsitsinermut Nuummi, Ilulissani Qaqortumilu mittarfiini atasuni taakkunungaluk ilaareersunik illunik, teknikkikkut sanaartukkanik kiisalu pigisanik nuunneqarsinnaasunik akileeqaataasutitut tunniussineq ilaatinneqarpoq.

Ingerlatseqatigiiffiup siulersuisui Naalackersuisuni ataatsimeersuartitsinermi toqqarneqassapput, siulersuisunut ilaasortat pikkorissut 5-7-it mittarfinnik imaluunniit attaveqaqatigiinnermi sanaartukkanik assigusunik, sanaartormermut, aqutsinermut aningaasalersuinermullu tunngasunik naleqquttumik paasisimasaqarlutillu misilittagaqassapput. Ingerlatseqatigiiffiup siulersuisui ataatsimut inuussutissarsiornikkut aqutsinikkullu piginnaasaqassapput kiisalu mittarfinnik aqutsinerup iluani aqutsinikkut piginnaasaqarlutik, silaannakkullu angallannermut tunngasunik ilisimasaqarlutik. Inuk, siulersuisuni ilaasortaasinnaangilaq imaluunniit sinniisussaasinaanani, Inatsisartunut imaluunniit Naalackersuisunut ilaasortaaguni, imaluunniit akiliisinnajunnaarnermut atatillugu ingerlassami imaluunniit akileraarnermik unitsitsinermiikkuni taakkunaniilluniluunniit paasineqaruni, akileraarnermut inatsimmik ingasattumik unioqqutitsisimasutut eqqartuunneqarsimaguni imaluunniit Kalaallit Nunaanni pinerluttulerinermut inatsimmi, imaluunniit Danmarkimi nunaniluunniit allani inatsisinik naapertuuttunik aningaasaqarnikkut pinerluttulerinermut aalajangersakkanik unioqqutitsisimaguni. Siulersuisut ingerlatseqatigiiffiup qullersaqarfianik atorfinitsitsillutillu soraarsitsissapput. Taamaallaat, siulersuisut piginnaasaannut naapertuuttumik piginnaasalimmik atorfinitsitsisoqarsinnaavoq. Siulersuisuni Namminersorlutik Oqartussanit Ineqarnermut, Sanaartormermut Attaveqaqatigiinnermullu Naalackersuisoqarfiup pisortaanit kiisali Mittarfeqarfiit pisortaanit aallartitaqassasut siunnersuutigineqarpoq – Taaneqartut kingulliit marluk siulersuisut sulineranni peqataanerminnut akissarsiaqartinneqassangillat.

Siulersuisunut ilaasortanik pikkorissunik sulilersitsinissamut tunngatillugu, aktiaatileqatigiiffinni pisortanit pigineqartuni siulersuisut akissarsiarisinnasaannut sinaakkummi qaffasinnerpaami akilersorneqartariarput, matumunnga tunngatillugu Naalackersuisut malittarisassaannut naleqqiullugu. Siulersuisuni ilaasortat immikkut ittunik

## **Ilanngussaq 2, oqaasertaliussat oqaasertaliussanullu nassuiaatit**

ajornakusoortunik piffissartornartunillu suliaqarsimasut, immikkut akissarsitinneqarsinnaapput.

Nuna tamakkerlugu pilersaarusiornermut soqutigisanik suliarinninnermut atatillugu, mittarfinnik nutaanik atortulersuutinillu taakkununnga atasunik pilersitsinnermut atatillugu, Naalakkersuisut isumaqatigiissuteqarsinnaapput kommunini sanaartorfigiuminarsaanermi aningaasartuutit akilernissaannut.

Nuna tamakkerlugu pilersaarusiornissamat peqqussutikkut, mittarfinnik nutaanik sanaartornissamat taakkununngalu ilaasunut atortulersuutinut, illunutt, teknikkikkullu sanaartukkanut aalajangersakkat peqqissaarnerusut Naalakkersuisut aalajangiussinnaavaat aamma Naalakkersuisut aalajangersinnaavaat, nuna tamakkerlugu pilersaarusiornissamat puqqussut, Ilulissani, Nuummi imaluunniit Qaqortumi mittarfiliarluni sanaartornissani, taakkununngalu ilaasunut atortulersuutinut, illunutt, teknikkikkullu sanaartukkanut nunaminertamat atuinermut aalajangersakkat peqqissaarnerusut, kommunimi pilersaarutitut inatsisitigut kinguneqassasut.”

### **Kontu pingaarnermut 10.13.11 Aktiaateqarluni ingerlatseqatigiiffinnut toqqaannartumik aningaasartuutit, oqaasertaliussamat nassuiaatit**

Oqaasertaliussanut imatut ilanngussaqaassasoq qinnutigineqarpoq:

“Ilulissani, Nuummi Qaqortumilu mittarfinnik nutaanik pilersitsinissanut, Ilulissani Nuummilu 2.200 meterinik takissusilinnik kiisalu Qaqortumi 1.499 meterinik takissusilimmik mittarfiliornissanut tuavisaarutitut, Naalakkersuisut aktiaatileqatigiiffimmik pilersitsiniarlutik, aalajangernerisa kingunerisaanik, 200 mio. kr.-nik aningaasanik aningaasaliinissamik kiisalu Nuummi, Ilulissani Qaqortumilu mittarfiini atasuni taakkununngalu ilaareersut illut, teknikkikkut sanaartukkat kiisalu pigisat nuunneqarsinnaasut, nalinginik akileeqataassutikkut akiliinissamik oqaasertaliussaq pisinnaalersitsivoq.

Saniatigut oqaasertaliussap Naalakkersuisut piginnaatippai, 100 mio. kr.-nit tungaannut ingerlatseqatigiiffimmut akisussaaffilimmik taarsigassarsititsinnaanissaannut, ingerlatseqatigiiffinnit tamakkiisumik imaluunniit ilaannakumik namminersorlutik oqartussanit pigineqartunik, pissarsiassanik, iluanaarutunik assigisaannillu tigusaqarunik. Pissarsiassatut, iluanaarutitut, assigisaannillu isertitatut isigineqarput Aningaasanut Inatsimmi isertitatut aningaasaliissutinik qaangiisut. Oqaasertaliussamik Naalakkersuisut piginnaatinneqarput, isertitanik immikkut ittunik taamaattunik, isertitatut naatsorsuusiornermik aningaasartuutitullu naatsorsuusiornermi timalimmik aalajangiisinnaassasut, aktiaateqarluni mittarfiutilimmut taarsigassarsiatut aningaasat atorneqarnissaannut aamma siunertaqartumik, taamaasilluni pisinnaatitsineq IST-mut sunniuteqassanngilaq. Aningaasaqarnermut Akileraartarnermullu Pisinnaatitsinermik atuinermi Ataatsimiititaliaq erngerluni nalunaarfigineqassaaq.

## **Ilanngussaq 2, oqaasertaliussat oqaasertaliussanullu nassuiaatit**

Oqaasertaliussami allassimapput, aktiaatileqatigiiffimmik pisortanit pigineqartumik pilersitsinissamut aqutsinissamillu, Ilulissani, Nuummi Qaortumilu mittarfinnik nutaanik pilersitsisussamik suliarinnittussamut sinaakkutit.

Naatsorsuutigineqarpoq mittarfissat sanaartornissaannut tunngatillugu ingerlatseqatigiiffik taarsigassarsinissamut isumaqatiginninniartassaaq taarsigassarsisassallunilu. Taarsigassarsineq Naalakkersuisuni ataatsimeersuarnermi akuerineqartassaaq aammalu, taarsigassarsinermut aalajangersakkanik tunngavissanillu, Missingersuusiornermut aamma Naatsorsuuserinermut inatsisissatut siunnersuummiittunik, Naalakkersuisut UPA2016-imi (UPA2016/20) saqqummiussassaanniittunik ataqqinnissalluni. Tamanna aningaasaqarnikkut kingunerisassani ataani allaaserineqartuni itisilerneqassaaq. Taarsigassarsisarnermut aalajangersakkanik imaluunniit tunngavissanik allanik Inatsisartut akuersissuteqarpata, taakku akuersissutigineqarneranit atuutilissapput.

Naalakkersuisuni ataatsimeersuarnermi akuersissutigineqarneratigut ingerlatseqatigiiffik aamma namminersorlutik suliaqartunik suleqateqarnissamik isumaqatigiissuteqarsinnaapput, tamanna sanaartornermik siuarsaasinnaasutut imaluunniit suliami aningaasaqarnerup tamarmiusup pitsanngorsarneqarneranik kinguneqartussatut siulersuisut nalilerpassuk.

Oqaasertaliussaq nutaajuvoq.”

Aningaasaqarnermut Akileraartarnermullu Ataatsimiititaliamit akuerineqartoq ulloq 03-06-2016, suliap nr. 16-713.

### **Aningaasaqarnermut Akileraartarnermullu Naalakkersuisoqarfik – Suliassaqarfik 20-24**

#### **Konto pingarneq 20.40.02-mut, Nuna tamakkerlugu digitalinnortitsinissamut periusissap atuutsilerneru**

Kontumut pingarnermut matumunnga oqaasertaliussat nr. 2 peeqquneqarput, tullinnguuttunillu taarserlugit. Tamanna aqqutigalugu atuinerunissat atuinikinnerunissalluunniit nuunnissaannut piginnaatitsissutip 10 %-imiit 50 %-inut qaffaqquneqarpoq. Taamatut qummut qaffaasoqarneranut pissutaavoq 'Ilanngaassivik' pillugu 2016-imi ineriartortitsinissamut 4,5 mio. kr.-nit immikkoortinneqartut naatsorsuutigisatut siunertamut atorneqarsimangimmata, tamatumunngalu pilersaarummut ineriartortitsinissap kinguaattoorfiunera pissutaavoq. Oqaasertaliussanik massakkut allannortitsinikkut aningaasat atorneqanngitsoortut 2017-imi siunertamut atugassanngortillugit nuunneqarsinnaalerput. Taamatut oqaasertaliussanik allannortitsineq AIS2017-ip aappassaaneerqarnerani AI2017-imut ilanngunneqarpoq.

”Nr. 2.

Naalakkersuisut piginnaatinneqarput konto pingarnermi uani atuinerussutinik atuinikinnerussutinilluunniit ukiumut aningaasanut inatsiseqarfiusumut tullermut

## **Ilanngussaq 2, oqaasertaliussat oqaasertaliussanullu nassuiaatit**

nuutsisinnaanissaminnut. Ukiumi aningaasaliiviusumi tassani aningaasaliissutit 50 pct-ii angullugit nuunneqarsinnaapput."

### **Konto pingarneq 20.40.02-mut, Nuna tamakkerlugu digitalinngortitsinissamut periusissap atuutsilersinner-mut nassuiaatit**

Oqaasertaliussanut nr. 2-mut nassuiaatit peeqquneqarput tullinnguuttunillu taarserlugit:

"Nr. 2.

Aningaasaliissutit ajunnginnerusumik atorneqarnissaat qulakkeerniarlugu ukiut aningaasanut inatsiseqarfiusut akornanni aningaasanik nuussinissamut Naalackersuisut tunngavissaqarnissaat oqaasertaliussatigut qulakkeerneqarpoq.

Ilassutit aningaasaliissutit matumani pineqartut aqutigalugit oqaasertaliussat AI2016-imut sanilliullugit allanngortinneqarput, taamaalillunilu kontumi pingarnermi matumani atuinerunerit atuinikinnerunerilluunniit aningaasanut inatsiseqarfiusumut tullermut nuunnissaanni aningaasaliissutit 10 aamma 50 pct.-iannut qummut allanngortinneqarmat. Taamatut oqaasertaliussanik allannguneq taamaattoq AIS2017-ip aappassaaneernerani AI2017-imut ilanngunneqarpoq."

Aningaasaqarnermut Akileraartarnermullu Ataatsimiititaliamit akuerineqartoq ulloq 01-12-2016, suliap nr. 16-740.

### **Peqqissutsimut Nunanillu Avannarlernik suleqateqarnermut**

#### **Naalackersuisoq – Suliassaqarfik 34**

#### **Siunertanut kontunut 34.11 Immikkut ittumik katsorsaanerit, 34.12 Peqqissaaveqarfiit ataa-tsimullu aningaasartuutit, 34.13 Peqqissaaveqarfiit, kigutissaasunit sullinneqarneq aamma 34.15 Pinaveersaartitsineq peqqinnissamillu siuarsaaneq**

Oqaasertaliussat makkua 2016-imut aningaasanut inatsimmi siunertanut kontunut, 34.11 Immikkut ittumik katsorsaanerit, 34.12 Peqqissaaveqarfiit ataa-tsimullu aningaasartuutit aamma 34.13 Peqqissaaveqarfiit, kigutigissaasunit sullinneqarneq, oqaasertaliussanut taarsiunneqarnissaat qinnutigineqarpoq:

"Kontut pingarnerit makku akornanni aningaasaliissutaasunik nuussinissamik Naalackersuisut piginnaatinneqarput: 34.11.01 Napparsimasut nunani allani katsorsarneqartarnerat, timikkut nappaatit, 34.11.02 Napparsimasut nunani allani katsorsarneqartarnerat, tarnikkut nappaatit, 34.11.03 Dronning Ingridip Napparsimavissua, 34.11.04 Kalaallit nakorsiartut najugaqarfiat, 34.11.05 Imigassanik ajornartorsiuteqartunut katsorsaasarfiit, 34.11.07 Kræfti pillugu pilersaarut, 34.11.08 Atornerluisunik katsorsaanerimut pilersaarut, 34.12.01 Peqqissaaveqarfiit, nakorsanit sullinneqarneq, 34.12.02 Peqqinnissakkut ilinniartitaanikkullu nuna tamakkerlugu suliniutit, 34.12.03 Ataatsimut aningaasartuutit, napparsimasunik angallassinertit il.il., 34.12.05 Nuna tamakkerlugu nakorsaaserisoqarfik, 34.12.06 Ataatsimut aningaasartuutit aamma 34.13.01 Peqqissaaveqarfiit, kigutigissaasunit sullinneqarneq aamma 34.15.01 Inuuneritta."

## **Ilanngussaq 2, oqaasertaliussat oqaasertaliussanullu nassuiaatit**

### **Siunertanut kontunut 34.11 Immikkut ittumik katsorsaanerit, 34.12 Peqqissaaveqarfiit ataa-tsimullu aningaasartuutit, 34.13 Peqqissaaveqarfiit, kigutissaasunit sullinneqarneq aamma 34.15 Pinaveersaartitsineq peqqinnissamillu siuarsaaneq pillugit nassuiaatit**

Oqaasertaliussanut nassuiaatit makkua 2016-imut aningaasanut inatsimmi siunertanut kontunut, 34.11 Immikkut ittumik katsorsaanerit, 34.12 Peqqissaaveqarfiit ataatimullu aningaasartuutit aam-ma 34.13 Peqqissaaveqarfiit, kigutigissaasunit sullinneqarneq, oqaasertaliussanut taarsiullugit ilan-ngunneqarnissaat qinnutigineqarpoq:

Sulisoqarneq ataatimullu ineriartorneq apeqqutaatillugit kontuni pingaarnerni ataasiakkaani atui-nerit ukiumiit ukiumut allanngorarsinnaasarmata oqaasertaliussat ilanngunneqarput. Peqqinnissa-qarfiup ingerlanneqarnera pisariinnerulersinniarlugu kontut pingaarnertit ataatimullu akornanni ani-ngaasaliissutinik nuussisinnaanissaq pisariaqartinneqarpoq.

Oqaasertaliussaq ilassutitut matumani aningaasaliissutaasutigut AI 2006-imut naleqqiullugu kontut pingaarnertigut ukunuuna 34.11.07 Kræfti pillugu pilersaarut, 34.11.08 Atornerluisunik katsorsaanerit pilersaarut aamma 34.03.01 Inuuneritta allanngorput, aningaasaliissutit nuunnissaannut Naalakkersuisut piginnaatinneqarnerannut kontut pingaarnertit taakku ilaapput.

Aningaasaqarnermut Akileraartarnermullu Ataatsimiititaliamit akuerineqartoq ulloq 25-05-2016, suliap nr. 16-720.

### **Ineqarnermut, Sanaartornermut Attaveqarnermullu Naalakkersuisoq - Suliassaqarfik 70 - 72**

#### **Konto pingaarneq 72.20.05-imut, Ilaasunik angallassinermut tapiissutit**

Oqaasertaliussat uku 2016-imut aningaasanut inatsimmi ilaasunik angallassinermut tapiissutit pillugit konto pingaarnertit 72.20.05-imut oqaasertaliussaq nr. 1-imut paarlaallugit ilannguteqquneqarput:

#### **”Nr. 1**

Naalakkersuisut piginnaatinneqarput suliassat suliarineqarnissaannut avataani suleqatigisartakkanit isumaqatigiissuteqarnissamut, konto pingaarnertit matumunnga piffissami 1. januar 2017 - 31. december 2020-mi siunertarineqartut iluanniittut tunngavigalugit. Isumaqatigiissutit tamatuma kingornatigut ukioq ataaseq tikillugu sivisunerpaamillu 31. december 2021 tikillugu sivitsorneqarsinnaapput. Isumaqatigiissutit aningaasanut killiliussat 623 mio. kr.-nik annertussuseqartut ukiumi 5-ini atuuffiini sinnerneqassanngillat, taakku ukiumut 124,6 mio. kr. naligaat.

Isumaqatigiissutissat isumaqatiginninniutigineqarnissaat sioqqullugu Naalakkersuisut isumaqatiginninniaqataasussamik peqataatitaqassapput, Inatsisartut Aningaasaqarnermut Akileraartarnermullu Ataatsimiititaliaanit akuerineqartussamik. Isumaqatiginninniutissaq aningaasatigut atugassarititaasunik angallassiviusussallu ataatimullu qanoq akulikitsigisumik tikinneqartarnissaannik imaqarpoq.”

## **Ilanngussaq 2, oqaasertaliussat oqaasertaliussanullu nassuiaatit**

### **Konto pingaarneq 72.20.05-imut, Ilaasunik angallassinermut tapiissutit, nassuiaatit**

Oqaasertaliussanut nassuiaatit uku 2016-imut aningaassanut inatsimmi ilaasunik angallassinermut tapiissutit pillugit konto pingaarnermut 72.20.05-imut oqaasertaliussaq nr. 1-imut paarlaallugit ilannguteqquneqarput:

#### **”Nr. 1**

Tamanut timmisartumik angallassinerep umiarsuarmillu angallassinerep ingerlannissaannut isumaqatigiissuteqarnikkut sipaarniuteqarnikkut ukiuni arlalinni atuuttussamik isumaqatigiissuteqarnissamut Naalackersuisut tunngavissaqalernissaat oqaasertaliussatigut qulakkeerneqarpoq.

Kiffartuussinissamik isumaqatigiissutinut tapiissutit ornigassatut pingaarnertut tunngavilersuutaasut pingasut malillugit tunniunneqassapput:

- angallannikkut periarfissaqartussaangikkaluanut.
- akit pissutigalugit angalasinnaangitsorpassuarnut.
- akuttunerusumik tikinneqartartussaagaluanut.

Isumaqatiginninniarnissamut angallassisartussanut Naalackersuisut pituttuisumik isumaqatigiissusiornissaannut atugassarititaasussat sinaakkusersorneqassapput. Atugassarititaasut taakkua aningaasanut inatsimmiit aningaasatigut atugassarititaasut saniatigut, sullissinerup isumagineqarnissaanut qulakkeerinninnissamik, pitsaassutsimik kiisalu CSR-mik pi-umasaqaateqarnissamik ilaqassapput.

Inatsisartut Aningaasaqarnermut- Akileraartarnermullu Ataatsimiititaliaanut isumaqatiginninniartitassap akuersitinneratigut, angallassinissamut isumaqatigiissutinut tunngaviusut suliap aallartinneqarneraniilli ilusilersorneqarneranut Inatsisartut sunniuteqaqataanissaat qulakkeerneqassaaq.

Oqaasertaliussat ilassutitut aningaasaliissuteqarnikkut matumuuna aningaasatigut atugassarititaasut tamarmiusut AI 2016-imut tunngatillugu allanngortinneqarput, aningaasatigut atugassarititaasut piffissamut 1. januar 2017 - 31. december 2020-mut isumaqatigiissuteqarfigineqarsinnaasut, 614,5 mio. kr.-nit 623 mio. kr.-nut qaffanneqarput. Kiffartuussinissamik isumaqatigiissutit nutaat atuutsinneqalerneranni meeqqat utoqqalinersiutillillu akikillisaaffigineqarnissaat pillugu isumaqatigiissuteqarnissamut qaffaaneq periarfissiivoq.”

Aningaasaqarnermut Akileraartarnermullu Ataatsimiititaliamit akuerineqartoq ulloq 02-09-2016, suliap nr. 16-730.

**Ineqarnermut, Sanaartornermut Attaveqarnermullu Naalakkersuisoq - Su-  
liassaqarfik 80-89**

**Kontomut pingaarnermut 89.72.11 Nammineq inissianik tapiissutitalimmik sanaar-  
torneq**

Oqaasertaliussat tulliuttut ilanngunniarneqarput:

“Nr. 3.

Naalakkersuisut piginnaatinneqarput, inissiani pioreersuni iluarsaassinissamut annerpaamik 150.000 koruuninik taarsigassarsititsinissamut. Piumasaqaatit uku naammassineqarsimassapput:

- Illumik piginnittup utoqqalinersiaqarnini imaluunniit siusinaartumik pensionisiaqarnini uppersarsassavaa
- Illumik piginnittup realkredit-imit aningaaserivimmilluunniit taarsigassarsinnaannginnini uppersarsassavaa
- Illumik piginnittoq inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersoq naapertorlugu tapiiffigineqarnissamik taarsigassarsinissamilluunniit piginnaatinneqassanngilaq
- Illumik piginnittup illup sillimaserneqarsimanini imaluunniit illumik piginnittup sillimasiissummut akilinngitsuukkaminik akiitsoqannginnini uppersarsinnaassavaa
- Illumik piginnittup pisortanit akiligassanngortinneqartunik akiitsoqannginnini uppersarsinnaassavaa
- Suliassat avatangiisinik nukissiornermillu pitsannguiffiusumik suliniutinik tunngaveqassapput
- Taarsigassarsinissamik qinnuteqaat pilersaarusionermut aningaasartuutininik, sanasunut aningaasartuutininik, qularnaveeqqusiussaqaarluni taarsigassarsinermi allagartap suliarineranut kiisalu naqissusiinermut akitsuummumut aningaasartuutininik imaqaarsinnaavoq. Taarsigassarsiniarluni qinnuteqartup nammineq suliassa nalingi aningaasartuutininut tamarmiusunut ilaatinneqassanngillat.
- Suliassat tassaasinnaapput illup silataata qalliutaasa, igalaat, matut silarliit, qaliat, innaallagissamik pilersuinerimi atortut, kuuffiit, isaarissat, erngup naqitsineranut atortut assigisaasalu atasinnaassusiinik sivitsuinerit.
- Illup atorneqarneranut atuinermulluunniit, imaluunniit suliassanut inuulluataarniutitut taaneqarsinnaasunut taarsigassarsititsisoqassanngilaq.
- Suliassat suliarineqannginnerini taarsigassarsinissamut neriorsuuteqartoqarsimassaaq.

Inissiap qularnaveeqqusiunneqarneratigut taarsigassarsiat sillimaserneqassapput. Taarsigassarsiat taarsigassarsiaasinnaasunit, inissiaq qularnaveeqqusiullugu taarsigassarsiaasimasunit allanit salliutinneqassapput. Arlalinnik taarsigassarsititsisoqarsinnaavoq, taarsigassarsiali taakku annerpaamik katillugit 150.000 koruuninik amerlassuseqassapput.



## **Ilanngussaq 2, oqaasertaliussat oqaasertaliussanullu nassuiaatit**

Iluarsaassinerup naammassinerani aammalu qularnaveeqqusiussaqaarluni taarsigassarsinermi allagartap uparuaanertaqanngitsup takutinneqarnerani taarsigassarsiarititassat akilerneqassapput.

Taarsigassarsiat piginnittut nikinneranni akiligassanngortinneqassapput, tamatumani piginnittut nikinnerat taarsigassarsisup taarsigassarsisumullu aappaasup akornanni pinngippat, imaluunniit taarsigassarsisoq allamik aalajangiisimangippat.

Taarsigassarsiat akiligassanngortinneqassapput,

- Taarsigassarsisup inissiaq ikuallattoornissamut anorersuarmullu sillimmasinngitsoorpagu
- Taarsigassarsisoq inissiamit nuuppat
- Taarsigassarsisup inissiaq attartortippagu
- Taarsigassarsisup inissiaq inuussutissarsiornermik siunertaqarfiusumik aaqqissuuppagu. Tassanili inuussutissarsiutit minnerit, killilersuinngitsut pineqanngillat.”

### **Kontomut pingaarnermut 89.72.11 Nammineq inissianik tapiissutitalimmik sanaartorneq oqaaseqaatit**

Oqaasertaliussanut nassuiaatit tulliuttut ilanngunniarneqarput:

“Nr. 3.

Oqaaseqaatini utoqqalinersiallit aamma siusinaartumik sulisinnaajunnaarnersiutillit ileqqaagaqanngitsut, imaluunniit realkredit-imit aningaaserivimmilluunniit taarsigassarsillutik illuminni pilersaarutaasumik piffissalikkamillu aserfallatsaaliuinissamut aningaasalersuisinnaanngitsut taarsigassarsitinneqarsinnaanissaat periarfissinneqarpoq. Taamaalilluni aaqqissuussineq pensionistit aamma siusinaarlutik pensionistit nammineerlutik angerlarsimaffimminniiginnarnissamut periarfissaannik pitsannguissaaq.

Oqaaseqaat saqqummiunneqartoq maleruagassanut, illuliortiternernut aningaasalersuineq pillugu Inatsisartut peqqussutaat nr. 1, 7. maj 2007-imeersoq naapertorlugu iluarsaassinissamut taarsigassarsisarnermut maleruagassanut nallersuunneqarpoq, tamatumani inissiap angissusissaata annerpaaffissaa aammalu inissiap pisoqaassusiata annikinnerpaaffissaa aalajangersarneqanngillat. Matumani taarsigassarsiarititassat, pilersaarutaasumik piffissalikkamillu aserfallatsaaliuinnermut, pingaartumillu inissiap silataata qalliutaanut atorineqartussat pineqarnerat eqqarsaatigineqarpoq.

Oqaaseqaat nutaajuvoq.”

Aningaasaqarnermut Akileraartarnermullu Ataatsimiititaliamit akuerineqartoq ulloq 09-03-2016, suliap nr. 15-707.